

# «Ins enconuscha mai en il chantun»

Martullo-Blocher è satisfatga da ses resultat

■ (anr/rgd) La novelegida cussegliera naziunala **Magdalena Martullo-Blocher** è fitg cuntenta cun ses resultat. «Ils Grischuns vulan ina politica che porscha soluziuns», è **Martullo-Blocher** persuadida. **Sias 18901 vuschs muntan il terz meglier resultat da tut ils candidats.** Las bleras vuschs fa *Heinz Brand* (pps) cun 23 183, suandà da *Martin Candinas* (pcd) cun 21 782 vuschs. *Silva Semadeni* (ps) defenda ses sez cun 14 863 vuschs e *Duri Campell* (pbd) conquista cun 12 570 vuschs in sez en il cussegl naziunal.

## Magdalena Martullo-Blocher è satisfatga

La directura da la EMS-Chemie è fitg cuntenta cun ses resultat. «Jau n'era betg segira da vegnir elegida», di la novelegida cussegliera naziunala, «ma jau hai senti ina gronda fidonza da la populaziun durant il cumbat electoral. Jau sun stada ed hai discuri persunalmain cun las votantas ed ils votants», di **Martullo-Blocher**, «quai è sta il motiv per mes bun resultat.» Ils custs dal cumbat electoral inditgescha **Martullo-Blocher** sco pitschen. «Nus avain pendì si sez il placats.» Ussa vul la nov'elegida cussegliera naziunala sa concentrar sin sia lavur a Berna. «Jau vi esser ina represchentanta da l'economia e dal Grischun.» Il meglier resultat da tut las candidatas e candidats ha obtegni *Heinz Brand* da la Partida populara svizra. «Jau sun fitg cuntent cun il resultat da mia partida e gratuleschel a *Magdalena Martullo-Blocher* per si'elecziun.» En vista al resultat en l'entira Svizra discurre *Brand* d'in success cumplain per sia partida. «La delegaziun grischuna vegn segiramain rinforzada cun quest resultat dad oz.»

## Il resultat personal legra Martin Candinas

Il candidat da la pcd fa il segund meglier resultat dals candidats en il Grischun. **Martin Candinas** è cuntent cun ses resul-


tat persunal e cun il resultat da sia partida: «Jau sun cuntent d'avair pudì augmentar mes resultat en congual cun avant quatter ons.» Er en la legislatura vegnenta vul **Candinas** s'engaschar vinavant a favur da las famiglias e da las regiuns muntagnardas. «Jau cumbattel a Berna per in bun provediment da basa er en regiuns periferas», di cusseglier naziunal **Candinas**. Era da la prestaziun da sia partida è **Martin Candinas** satisfatg, cunzunt er da la partida giuvna. «La pcd giuvna è la pli ferma partida giuvna dal chantun. Quai am fa grond plaschair», di cusseglier naziunal **Candinas**. Er il fatg che la pcd ha pudì tegnair stabil sia quota d'electurs è per **Candinas** in motiv da legria. «Nus essan fitg engraziavels per la fidonza dals electurs», intuna **Candinas**, «questa saira envidain nus ad ina festa d'elecziun publica a Rabiun.» Malgrà il resultat da **Candinas** n'ha l'allianza burgaisa dentant betg pudì evitar l'elecziun da **Magdalena Martullo-Blocher** en il cussegl naziunal. Quest verdict trubistgescha in pau il plaschair en las retschas da la pcd. **Martin Candinas** spera dentant da savair collavurar cun la novelegida: «Nus sco partida dal center avessan natiralmain preferi da pudair collavurar cun las autras partidas burgaisas.» Che la pps conquista in segund sez è er per **Martin Candinas** ina surpraisa. «Questa elecziun è ina surpraisa per nus. Jau spetg cun tensiun co che la collavuraziun vegn ad esser.»

## Silva Semadeni tema ina radicalisaziun da la politica

La cussegliera naziunala **Silva Semadeni** ha defendì il sez da la Partida socialistica a Berna. Ella è engraziavla per la fidonza ch'ella ha retschavi: «Jau engraziavel a tut las votantas ed als votants che m'han puspè elegì en il cussegl naziunal.» Cun il resultat general en il chantun n'è ella dentant betg cuntenta: «La politica daventa cun l'elecziun da **Magdalena Martullo-Blocher** pli dira, er en il Grischun», è **Sema-**

## Nationalratswahlen

Die SVP kann um 5,2 Prozent Wähleranteile zulegen und bleibt die klare Nummer 1 im Kanton.



Quelle: Schweizerische Bundeskanzlei; Grafik: La Quotidiana

deni persvasa. **Silva Semadeni** è però cuntenta che sia partida dumogna da mantegnair la quota electorala da var 20 per tschient.

## Emoziuns divergentas tar Duri Campell

Da nov en il cussegl naziunal è elegi **Duri Campell** da S-chanf. El ha pudì defender il sez da *Hansjörg Hassler* ch'è sa retratg da sia lunga carriera sco cusseglier naziunal a Berna. La pbd sto dentant prender encunter sperditas da passa tschintg per tschient da la quota d'electurs. Er pervia da questa sperdita n'ha l'allianza burgaisa betg pudì evitar che la Partida populara conquista in segund sez. Il motiv per la digren è tenor **Duri**

**Campell** la mancanza d'in candidat verd: «Stuvair remplazzar in cusseglier naziunal reconuschì sco *Hansjörg Hassler* è grev. Nus avain bain pudì defender il sez per la partida, avain dentant suffrì considerablas sperditas da la quota d'electurs.» Senza l'economia electorala saja quai stà ina sfida.

## Josias Gasser sto prender cumia da Berna

Rumir ses sez en il cussegl naziunal sto suenter ina legislatura il verd-liberal **Josias Gasser**. Avant quatter ons eri reussì ad el da conquistar in sez grazia a la colliaziun da glista cun la ps. Questa giada ha el fatg naufragi cun sia strategia. Malgrà sias 12 990 vuschs na gartegia la reelecziun

betg a **Josias Gasser**. Ils motivs per quest resultat veda **Gasser** differenziadamain: «Nus verd-liberals stuvain far attenta la populaziun anc pli ferm per nossas ideas.» En il cumbat electoral ha el senti ch'els temas dils verd-liberals sajan actuals en la populaziun grischuna. «Quest resultat na munta betg la fin da la Partida verd-liberala en il Grischun», intuna **Josias Gasser**, «nus cuntinuain cun noss cumbat per in'economia ecologica.» Il Grischun na tarmetta nagin represchentant liberal en il cussegl naziunal. La Partida liberal-democrata sto deponer sias ambiziuns sin in sez en il cussegl naziunal per ulteriurs quatter ons. La pld ha fatg naufragi cun si'emprova da reconquistar il sez perdi il 2011 als verd-liberals.



Daniel Albertin cun Karin Niederberger.



Sep Guetg (a san.) e Gottardo Rampa, dus commembers da la pcd, analyseschan ils resultats.



Avant ir tar la televisiun vegn da si il belet.



Guardan cun tensiun ils resultats: Urs Hardegger e Daniel Buchli (da san.).



Duas dunnas e duas candidatas da la pld: Raphaela Holliger e Vera Stiffer (da san.).